

MISTÉRIU DOLOROZU SIRA

INTRODUSAUN:

Hodi medita mistériu dolorozu sira, iha loron komemorasaun ita-nia Inan Auxiliadora nian, mai ita tau iha ninia liman ita-nia koslok no preokupasaun sira. Ita hatene husi esperiênsia rasik katak moris la fasil ba ema ida, no la dehan katak sai sarani, eh sai konsagrada/u, buat hotu sei la difisil tan.



Maibé Kreda haraik mai ita instrumentu ida ne'ebé halo ita-nia dalan sai forte no edificante liután, haraik mai ita fiar iha Jezús Kristu, hodi Maria nia intermédiu.

Nune'e, mak loron ba loron ita simu bolun atu luta kontra difikuldade sira, hodi manán an rasik hasoru buat ne'ebé dudu ita atu halo aat no la'ós di'ak, ho serteza katak ita iha Inan ida, Maria, ne'ebé, nafatin akompañá ita no lori ita ba Jezús.

MISTÉRIU 1: JEZÚS NIA ORASAUN NO AGONIA IHA TO'OS OLIVEIRAS NIAN

L1 - "Nia lori Pedro, Tiago no João hamutuk ho Nia. Nia hahú laran-taridu, laran-tauk. Nia dehan ba sira, «Ha'u laran susar to'o mate. Imi hela iha ne'e hodi matan moris neon na'in ba»" (Mc 14, 33-34).

L 2 - *Ita harohan ba ema hotu iha estadu laran-taridu no ta'uk nian, ba ema hotu ne'ebé sofre futuru deskoñesidu, liuliu iha tempu pandemia ida-ne'e, atu sira hetan konfortu iha Maria nia liman sira no forsa atu la'o iha Jezús Kristu nia liafuan sira.*

MISTÉRIU 2: EMA BAKU ITA-NA'I JEZÚS KRISTU

L1 - "Pilatos haruka ema lori Jezús hodi baku Nia" (Jo 19, 1).

L 2 - *Ita harohan ba vítima sira hotu ne'ebé sofre tipu oioin terus nian, física no psicolójika, atu sira iha aten-brani atu enfrenta terus sira no la husik ema ne'ebé haterus sira hanehan sira.*

MISTÉRIU 3: EMA LE'U AI-TARAK BA JEZÚS KRISTU NIA FUTAR ULUN

L1 - "Sira kolu nia hatais hodi taka fali ho unuk mean ida. Hafoin sira leu ai-tarak hamutuk hodi tau iha nia ulun; sira halo nia kaer fafulu ida ho nia liman loos. Sira hakneak iha nia oin hodi hamoe Nia, dehan: «Salve, Judeu sira-nia liurai!»" (Mt 27, 28-29).

L 2 - *Ita harohan ba ema hotu ne'ebé ema kolu sira-nia direitu no liberdade sira, atu maski iha difikuldade boboot nial aran, sira la husik atu la'o bá hasoru Kristu.*

MISTÉRIU 4: JEZÚS LORI KRÚS TUIR DALAN BA KALVÁRIU NO HASORU NIA INAN

L1 - "Sira kaer ema ida naran Simão housi Sirene, Alexandre no Rufo nia aman, ne'ebé fila daudaun husi to'os, atu lori krús. Sira lori Nia ba fatin ida naran Gólgota, katak, fatin ulun-ruin nian" (Mc 15, 21-22).

L 2 - *Ita harohan ba ema hotu ne'ebé simu bolun atu tulun ba sira-nia maluk sira, ne'ebé, maski sira lakohi, sira suporta sira-nian no maluk sira-nia krús.*

MISTÉRIU 5: EMA HEDI JEZÚS BA KRÚS NO NINIA MATE

L1 - "Jezús hakilar ho lia maka'as no dehan: «Aman, iha Ita liman Ha'u saran Ha'u nia klamar!». Dehan tiha ne'e, Nia iis kotu". (Lc 23, 33-46).

L 2 - *Ita harohan ba ema hotu ne'ebé la iha aten-brani atu dehan: "Aman iha Ita liman ha'u saran ha'u klamar". Sira ne'ebé tan akontesimentu sira moris nian, la konsege hakohak Aman, maibé, konserteza, sira, sira la'o daudaun ba hasoru Nia.*